

四庫全書

集部

欽定四庫全書

集部

詩話總龜卷二十八

詳校官侍郎_臣劉躍雲

主事銜_臣徐以坤覆勘

總校官編修_臣倉聖脉

校對官中書_臣李斯咏

謄錄監生_臣王鉞

欽定四庫全書

詩話總龜卷二十三

宋 阮 閱 撰

寓情門

曹修古立朝謇諤嘗見池上有一所似者作小詩曰荷

葉罩芙蓉員青映嫩紅佳人南陌上翠蓋立春風

青

箱雜記

唐僖宗朝自內製袍千領賜塞外吏士神策將軍馬直
於袍中絮得金鎖一枝詩一首云玉燭製袍夜金刀

呵手裁鎖情寄千里鎖心終不開直貨鎖于市為人
告其將并得詩奏聞僖宗令馬直赴闕以宮人賜直
為妻有情者為金鎖曲流於世

翰府名談

蜀人皆呼營妓為校書韋南康鎮成都罷之故胡曾有
詩贈薛濤曰萬里橋邊薛校書枇杷花下閉門居掃
眉才子知多少管領春風搃不如濤再為連帥所喜
因事獲怒而遠之作五離詩以獻遂復喜焉一曰犬
離家出入朱門四五年為知人性足人憐只因咬着親

情脚不得紅絲毯上眠二曰魚離池一入池中四五
秋常將朱尾玩銀鈎近緣戲觸紅蓮折不得隨波自
在遊三曰鸚鵡離籠慣向侯門養此身飛來飛去羽
毛新近緣言語無方便不得籠中再喚人四曰竹離
叢翦鬱栽成五行常持堅節待秋霜近來春笋鑽
堦破不得垂枝對畫堂五曰珠離掌一顆明珠內外
通分明皎潔水晶宮近緣一點瑕相累不得朝朝在

掌中

鑑戒錄撫言謂此是薛書
記上元微之未知孰是

成都女郎張窈窕上任事者詩曰昨日買衣裳今朝賣
衣裳衣裳都賣盡羞見嫁時箱有賣愁應緩無時心
轉傷故園胡虜隔何處是春桑

鑑戒錄

鄭還古博士東都閒居與柳將軍往還柳富有家姬鄭
與笑語柳知不恠也鄭將入京柳餞之鄭贈姬詩曰
冶艷出神仙歌聲雜管絃眼看白苧曲欲上碧雲天
未擬生裴秀如何知鄭玄莫教金谷水橫過墜樓前
柳見詩曰俟榮歸當為遣充賀禮及歸國子博士柳

遣姬入京師至嘉祥驛而鄭已物故柳甚悼之

古今

詩話

張祜客淮南幕中赴宴時杜紫微為支使座中有屬意
處索骰子賭色牧之微吟曰骰子逡巡裏手拈無因
得見玉纖纖祜應聲曰但知報道金釵落彷彿還應
露指尖

同前南部新書謂
此詩乃李義山作

封特卿為湖州軍倅與同年李大諫詩酒唱酬以疾阻
歡及愈有詩曰已負數條紅畫燭更辜雙帶綉香毬

白蘋洲上風烟好扶病湏拚到後籌後有離別難詞
佛許衆生願心堅石也穿今朝雖送別會却有明年

一座無不悽愴

雜志

李翱尚書牧江淮郡日進士盧儲投卷來謁李禮待之
置文卷几案間赴公宇視事長女及笄見文尋繹數
四謂小青曰此人必為狀頭李公聞之深異其語乃
募為婿來年果狀頭及第纔過殿試徑赴佳嫺催粧
詩曰昔年將去玉京遊第一仙人許狀頭今日已成

秦晉會早教鸞鳳下粧樓
廬止官舍迎內子入庭花
開乃題詩曰芍藥斬新栽
當庭數朶開東風與拘束
留待細君來

南部新書

房千里初上第遊嶺徼有韋滂自海南邀趙氏十九女
而許為房妾房迫於遊從暫與趙別後寄詩曰鸞鳳
分飛海樹秋忍聽鐘鼓越王樓祇應霜月明君意緩
撫瑤琴送我愁山遠莫教雙淚盡鴈來空寄八行幽
相知若返臨邛市畫舸朱軒萬里遊

萬里橋也

千里

以情托馬到府訪之趙氏已適韋秀才矣許與房韋
俱有布衣之舊不陳之則負房之言欲陳之則傷韋
之義作詩寄千里曰春風白馬紫絲韁正值蠶娘未
采桑五夜有心隨暮雨百年無節抱秋霜重尋綉帶
朱藤合却認羅裙碧草長為報西秦慰離恨阮郎纔
去嫁劉郎

雲溪友議

薛宜僚會昌中為左庶子充新羅冊禮使青州泛海船
船阻惡風雨至登州却漂回淹泊青州郵傳一年節

度使烏漢正尤加待遇有席中飲妓東美者薛頗多情連帥置於驛中薛發日祖筵嗚咽流涕東美亦然乃於席中留二詩曰經年郵驛許安棲未曾他鄉別恨迷今日海帆飄萬里不堪腸斷對含啼阿母挑芳方似錦王孫草長正如烟行雲行雨今辭夢惆悵歡情却一年薛到國未行冊禮旌節曉夕有聲旋深疾謂判官苗用曰東美何頻在夢中乎數日致卒苗攝大使行禮旅櫬回青州東美乃請假至驛素服致奠

哀號拊柩一慟而卒情緣相感頗為奇事

唐賢抒情

趙嘏頗有詩名不拘小節飲中贈歌者曰倚風無處過
梁塵雅唱清歌日日新來值漢庭花欲盡一聲留得
萬家春後因酒失悔過以詩上歙州府曰葉覆清溪
艷艷紅路橫秋色馬嘶風猶攜一榼郡齋酒傾對青
山憶謝公

敬相牧廬州有朝客留意飲妓祖送短亭妓車後至相
贈之曰望斷蘇娘小小坡竹湓金鴈展輕莎客卿幸

有凝情意何必臨尊始轉波

同前

大中年有江淮郡守名郎登樓縱飲見二遊女羅衣飄
飄目送久之因詠曰兩朶紅英值萬金教人不負看
花心高樓日晚東風急吹落千家何處尋在省日宣
宗顧問稱旨攝中郎將有詩曰宮娃引入玉為行金
殿齊趨近御床不見聖明親顧問如何得攝漢中郎
風神俊邁後擁節旄

南部新書

李尚書擢罷歙州吳貲交代有佐酒錄事名媚川頗留

意緣以納籍中妓韶光托於替人令存卹酒酣臨發
洪飲不勝離情有詩曰經年理郡少歡娛為習干戈
間飲徒今日臨行更交割分明留取媚川珠吳答曰
曳履長容日日歡湏言違德淚汎瀾韶光今已輸先
手領取蠟珠掌內看

同前

鄭詳縱情詩酒至廬江謁郡守留連嗟醉因贈妓曰臺
盤濶狹纔三尺似隔中當有阻艱若不騎龍與騎鳳
樂營門是望夫山

同前

江陵有士子游於交廣間而愛姬為太守所取納於高麗坡底及歸寄詩曰惆悵高麗坡底宅春風無復下山來守見詩遣還

白樂天任杭州刺史攜妓還洛後却遣回錢塘劉禹錫有詩曰其奈錢塘蘇小小憶君淚點石榴紅

越水李主簿遊廣陵迨春未返其姬寄詩曰去時盟約與心違秋日離家春不歸應是維揚風景好恣情歡笑到芳菲答曰偶到揚州悔別家親知相繫不因花

塵侵寶鏡雖相待長短歸時不及瓜

會昌中張睽防戎有功勒留蕃徼十年妻侯氏綉錦迴
文詩作龜形獻進曰睽離已是十秋強對鏡那堪重
整粧聞鴈燈前修尺素見霜心痛裂衣裳開箱疊練
先垂淚拂杵調砧更斷腸綉作龜文獻天子願教夫
婿早還鄉

崔左轄瓘牧江外郡祖席夜闌一營妓先辭歸崔與詩
曰寒簷寂寂雨霏霏埃館蕭條燭盡微祇有今宵同

此宴翠娥佯醉欲先歸

並同前

朱滔括兵不擇士族悉令赴軍自閱於毬場有士子進
趨間雅因問曰何業曰學詩有妻否曰有即令作寄
內詩曰握筆題詩易荷戈征戍難慣從鴛被暖怯向
鴈門寒瘦盡寬衣帶啼多漬枕鸞試留青黛著回日
畫眉看又令代妻答曰蓬鬢荆釵世所稀布裙猶是
嫁時衣胡麻好種無人種正好歸時又不歸滴憐之
遺束帛遣歸

古今詩話

韓晉公鎮浙西戎昱為郡刺史有郡妓美而善歌公召置籍中昱作詩以遣之且曰至彼令歌必首唱是詞既至公持杯妓歌昱詩公曰使君於汝寄情邪對曰然贈百縑而遣之歸其詞曰好去春風湖上亭柳條藤蔓繫人情黃鶯久住渾相識欲去頻啼四五聲

韓翃少負才名隣居有姓李者每將倡妓柳氏至其居必邀韓同飲愈熟柳每窺所往來皆名人因垂暇語李曰韓秀才甚貧然所與遊必時賢是必不久困宜

假待之李深然之具酒邀韓至謂韓曰公當今名士
柳當今名色名色配名士不亦可乎遂命柳與韓韓
懇辭李曰大丈夫相遇杯酒間一言道合尚相許以
死一婦人何足辭夫子貧柳資數萬可以取濟長揖
而去韓辭之柳曰此豪達者昨暮其言之矣俄就柳
歸來歲成名淄青節度使辟為從事韓以世方擾不
敢以柳同行置之都下期至而迂之三歲不果寄之
詩曰章臺柳章臺柳昔日依依今在否縱使長條拂

地垂如今攀折他人手柳答曰楊柳枝芳非節可惜年
年贈離別一葉隨風忽報秋縱使歸來不堪折

盧渥舍人應舉京師偶臨御溝見一紅葉上有一絕云
流水何太急深宮盡日間殷勤謝紅葉好去到人間
盧得之藏於巾篋及宣宗有旨許宮人從人盧所獲
人因覩紅葉而吁怨久之曰當時偶題不謂君得之
顧況在洛乘閒遊苑中水上得大桐葉有詩曰一入深
宮裏年年不見春聊題一片葉寄與有情人明日於

上游亦題於葉泛之波中曰花落深宮鶯亦悲上陽
宮女斷腸時帝城不禁東流水葉上題詩寄與誰十
日餘有客尋春苑中又於葉上得詩以示況云一葉題
詩出禁城誰人酬和獨含情自嗟不及波中葉蕩漾
來春取次行

開元中賜邊將軍大纁衣製於宮有兵士短袍中得詩
曰沙場征戍客寒苦若為眠戰袍經手作知落阿誰
邊留意多添線含情更著綿今生已過也重結後生

緣兵士以詩白帥帥進呈明皇以詩遍示宮中曰作
者勿隱不汝罪也有一宮人自言萬死明皇深憫之
遂以嫁得詩者謂之曰吾與爾結今生緣邊人感泣
張文新即中嘗為廣陵從事有歌妓常致情而終未果
納二十年後妓猶在籍中張罷江南郡道由廣陵時
李申鎮淮南宴飲極歡張以指染酒書一絕於盤上
相府命妓歌以侑張酒其詞曰雲雨分飛二十年當
時求夢不曾眠今來頭白重相見還上襄王玳瑁筵

酒罷令妓侍張歸

太和初有御史分務洛都有姬善歌時李逢吉留守欲
一見既不可辭遂往焉李有姬四十餘輩皆在其下
既入不復出作詩兩篇投李曰三山不見海沉沉豈
有仙蹤尚可尋青鳥去時雲路斷姮娥歸處月宮深
仙牕暗想春相憶書幌誰憐夜獨吟料得此時天上
月祇應偏照兩人心

一首已失

陳太子舍人徐德言尚叔寶妹樂昌公主陳政衰謂其

妻曰國破必入權豪家倘情緣未斷尚慕相見乃破鏡各分其半約他日以正月望日賣於都市及陳亡其妻果為楊越公得之乃為詩曰鏡與人俱去鏡歸人不歸無復姮娥影空留明月輝樂昌得詩悲泣不已越公知之愴然召德言至還其妻曰與德言樂昌餞別令樂昌為詩曰今日甚遷次新官對舊官笑啼俱不敢方信作人難

樂天姬樊素善歌小蠻善舞嘗為詩曰櫻桃樊素口楊

柳小蠻腰樊素年既長小蠻方豐艷因為楊柳詞曰
一樹春風萬萬枝嫩於金色軟於絲

唐戎昱守零陵妓籍中有善歌者相帥于公頓遽索之
昱乃遣行比至令歌乃昱送妓辭也其詞曰寶釧香
蛾翡翠裙粧成掩泣欲行雲殷勤好向襄王道莫向
瑤臺夢使君公曰大丈夫不能立功業為異代所稱
豈可奪人愛姬為己之娛遂贈以帛送歸零陵

五溪論事云蜀尚書侯繼圖本儒士一日秋風四起偶

倚欄於大慈寺樓有大桐葉飄然而墜上有詩云拭
翠欵雙蛾為鬱心中事搦管下庭除書成相思字此
字不書石此字不書紙書向秋葉上願逐秋風起天
下有心人盡解相思死天下負心人不識相思意有
心與負心不知落何地侯貯小帖凡五六年方卜任
氏為婚嘗諷此事任氏曰此是妾書葉時詩爭得在
公處曰向在大慈寺閣上倚欄得之即知今日聘非
關偶然也侯以今書較之與葉上無異

並同前

李茂復為會府從事出逢一小青衣有色馬上目之作
詩曰行盡疎林見小橋綠楊深處有紅蕉無端眼界
無分別安置心頭不肯銷其內子甚妒晚年牧泗州
有詩云落日西山近一竿世間恩愛極難拚近來不
作顛狂事免被冤家惡眼看

南部新書

謝郎中有女數歲能吟咏長嫁王元甫元甫調官京師
送別云此去惟宜早早還休教重起望夫山君看湘
水祠前竹豈是男兒淚染斑

青瑣集

詩話總龜卷二十三

欽定四庫全書

詩話總龜卷二十四

宋 阮 閱 撰

感事門

高力士謫巫州山谷多薺而人不食感之因作詩以寄
意曰兩京論斤賣五溪無人採夷夏雖有殊氣味都
不改

明皇雜錄

李適之在相位每退朝則邀賓客諧謔賦詩曾不備林
甫之害嘗為詩曰朱門長不閉親友恣相過年今將

半百不樂復如何及罷相又為詩曰避賢初罷相樂
聖且銜盃借問門前客今朝幾箇來及死非其罪時
人寃之

明皇幸蜀回至劔門謂侍臣曰劔門天險自古及今敗
亡相繼豈非在德不在險也因作詩曰劔閣橫空峻
鑿輿出狩回翠屏千仞合丹嶂五丁開灌木縈旗轉
仙雲拂馬來乘時方在德嗟爾勒銘才至德三年普
安郡太守賈深勒于石

開元傳信記

明皇將幸蜀登花萼樓使樓前善水調者登樓而歌曰
山川滿目淚沾衣富貴榮華得幾時不見而今汾水
上惟有年年秋雁飛顧侍者曰誰為此對曰宰相李
嶠詞也明皇曰真才子不待曲終而去

明皇傳信記

唐曲江開元天寶中嘗有殿宇因安史之亂遂盡圯廢
文宗覽杜甫詩云江頭宮殿鎖千門細柳新蒲為誰
綠因建紫雲樓落霞亭歲時賜宴及兩岍建亭館焉
春明退朝錄

劉洞嘗以詩百餘首獻李煜首篇乃石城懷古云石城
古岸頭一望思悠悠幾許六朝事不禁江水流煜覽
之掩卷改容金陵將危為七言詩大榜于路傍曰千
里長江皆渡馬十年養士得何人又云翻憶潘郎章
奏內悵悵日暮好沾巾蓋潘祐表云家國悵悵如日
將暮也

江南野錄

韓熙載高密人顯仕江南晚年奉貢入梁都絕知舊乃
題於館壁云未到故鄉時將謂故鄉好及至親得歸

爭如身不到目前相識無一人
出入空傷我懷抱風雨瀟瀟
旅館秋歸來窓下和衣倒夢
中忽到江南路尋得花中歸
舊處桃臉蛾眉笑出門爭向
前頭擁將去又云僕本江北人
今作江南客再去江北行舉目
無相識金風吹我寒秋月為
誰白不如歸去來江南

有人憶

江南野錄

後庭花亡陳之曲也杜牧之詩曰
烟籠寒月水籠沙夜泊秦淮
賣酒家商女不知亡國恨隔江
猶唱後庭花

故胡曾詩曰陳國機權未可涯如何後主恣驕奢不
知即入宮前井猶自聽吹玉樹花

思越人亡吳之曲也胡曾詩曰吳王恃霸棄賢才貪向
姑蘇醉醪醑不覺錢塘江上月一宵西送越兵來

柳枝歌亡隋之曲也胡曾詩曰萬里長江一旦開岸邊
楊柳幾千栽錦帆未落干戈起惆悵龍舟去不回韓
渥詩曰梁苑隋堤事已空萬條猶舞舊春風那堪更
想十年後誰見楊花入漢宮古今詩話謂此詩是韓

琮作又賀知章詩曰碧玉粧成一樹高萬條垂下綠
絲條不知細葉誰裁出二月春風似剪刀李咸用詩
曰新柳絲絲傍玉樓半垂橋上半垂流今年漸見枝
條密惱亂春風卒未休李涉詩曰錦江池上柳垂橋
風引蟬聲送寂寥不必如絲千萬縷只禁離恨兩三
條

鑑戒錄

天成初明宗召亡蜀舊宰臣王錯等賦蜀王降唐詩惟
牛希濟為佳詩曰滿城文武欲朝天不覺隣師犯塞

烟唐主再懸新日月蜀王還却舊山川非干將相扶
持拙自是君臣數盡年古往今來亦如此幾曾歡笑
幾潛然

元微之劉夢得韋楚客會於樂天之居因論南朝興廢
事各賦金陵懷古詩夢得方在郎省元公已居北門
夢得騁其才略無遜意滿引一觴請為首唱一揮而
成白公覽詩曰四人探驪龍而子先得其珠其餘鱗
甲將何為三公于是罷吟夢得詩曰王濬樓船下益

州金陵王氣黯然收
千尋鐵鎖沉江底
一片降幡出石頭
荒苑至今生茂草
古城依舊枕寒流
如今四海歸皇化
兩岸瀟瀟蘆荻秋

杜荀鶴朱梁時作時世吟十首今錄其兩首云
夫因兵亂守蓬茅
麻苧裙衫髻髮焦
桑柘廢來猶納稅
田園

荒盡尚微苗
時挑野菜和根煮
旋斫生柴帶葉燒

前雖見手

評論所載事固不同姑存其作

任是深山更深處也應無計避征徭

八十衰翁住破村村中牢落不堪論
因供寨木無桑

柘為點鄉兵絕子孫還似平寧催賦稅未曾州縣略
安存至今雞犬皆星散日落西山哭倚門

並同前

內侍張繼常為鎮戎軍鈐轄因題詩於廳事曰夜聞磧
外鈴聲苦曉聽城頭角調哀不是感恩心似鐵誰人
肯向此中來繼常能讀書有識好談論知治體中間入
內都知領郡

談苑

翠微寺在驪山絕頂舊驪宮也唐太宗避暑於此後寺
亦廢有遊人題云翠微寺本翠微宮樓閣亭臺幾十

重天子不來僧又去樵夫時倒一株松

鍾謨建安人為李璟奏表稱臣於周孫晟遇害獨赦謨
為輝州司馬有詩與州將云翩翩歸盡塞垣鴻隱隱
惟聞蟄戶蟲渭北離愁春色裏江南家事戰塵中還
同逐客紉蘭佩誰聽縲囚奏土風多謝賢侯振吾道
免令搔首泣途窮後畫江為界世宗召謨為衛尉卿
放還因作詩獻其畧云三年耀武羣雄伏一日回鑾
萬國春南北通歡永無事謝恩歸去老陪臣世宗覽

而悅之

並同前

元厚之昔隨侍在荆南從學於龍安寺僧舍後三十年以龍圖閣帥荊州昔之老僧猶在一日訪舊齋而門徑池臺如昔悵感久之因勑巨堂榜曰碧落題詩於堂曰九重侍從三明主四紀乾坤一老臣未幾召還翰林叅熙寧大政真可謂乾坤老臣也

古今詩話

王播少遊揚州惠照寺木蘭院隨僧飯僧頗厭之後二紀出鎮廣陵因訪舊遊向書字已為碧紗籠矣題二

詩曰二十年前此院遊木蘭初發院初修而今再到
經行處樹老無花僧白頭上堂已了各西東慚愧闍
黎餘後鍾二十年前塵撲面而今始得碧紗籠

古今詩話

北夢瑣言載後篇段
文昌題江陵佛寺

李翱尚書於潭州席上有舞柘枝者顏色慘怛侍御殷
堯藩即席贈詩曰姑蘇太守青蛾女流落長沙舞柘
枝滿坐綉衣皆不識可憐紅臉淚雙垂因問之乃蘇
州韋中丞愛姬所生女也因相為之吁嘆即命更其

舞衣於賓榻中擇士嫁之舒元興侍郎聞之贈李公
詩曰湘江舞罷忽生悲便脫蠻靴出絳幃誰是蔡邕
琴酒客魏公懷舊嫁文姬

古今詩話

杜甫開元中流竄秦越有秦中詩三十首其首叙曰有
弟皆羈旅無家問死生寄書多不達况乃未休兵后
歿衡州耒陽縣杜牧之常覽其集有詩曰杜詩韓筆
愁來讀似倩麻姑癢處搔天外鳳凰誰得髓無人解
合續絃膠

羅隱題杜甫集曰楚水悠悠浸耒亭楚南天地兩無情

忍交孫武重泉下不見時人說用兵

南部新書

詩云昔日青樓對歌舞今日黃埃聚荊棘山川滿目泪
沾衣富貴榮華能幾時不見而今汾水上惟有年年
秋鴈飛李嶠作也明皇深賞之當時未有太白子美
故嶠輩得稱雄爾意其遭罹世故不得不爾雨中聞
鈴且猶涕下嶠詩可不如撼鈴也以此論工拙殆未

可也

蘇公詩話

李士元嘗為僧遊初有登單于臺詩云悔上層樓望翻
成極目愁路沿葱嶺去河背玉關流馬散眠沙磧兵
閑倚戍樓殘陽三會角吹白旅人頭登華閣詩云亂
後獨來登大閣凭欄舉目盡傷心長堤過雨行人少
廢苑經秋草自深破落侯家通永巷蕭條宮樹接疎
林總輸釋氏青蓮館依舊重重布地金

雅言雜錄

張祜素藉詩名凡知己者皆當世英儒故杜牧之云誰
人得似張公子千首詩輕萬戶侯祜有華清宮詩為

世所稱云龍虎旌旗雨露飄鳳池歌斷玉山遙明皇
上馬太真去紅杏滿園香自銷

郡閣雅談

李朱厓平泉莊佳景可愛洛中士人詫於汪遵遵有詩
曰平泉風景好高眠水色風光滿目前剛欲平他不
平事至今惆悵海南邊汪過楊相宅有詩曰倚伏從
來事不遙無何平地起青霄纔到青霄却平地門對
古槐空寂寥

唐賢抒情

陳喬張俄重陽日登高於北山湖亭不奏聲樂因吟杜

工部九日宴藍田崔氏莊詩其末句云明年此會知
誰健醉把茱萸仔細看負外郎趙宣父時亦在集感
慨流涕者數四舉坐異之未幾趙卒

南唐近事

僖宗幸蜀有北省官忘名避地江左元昆扈蹕在蜀因
寄詩曰涉江今日恨偏多援筆長吁欲柰何倘使淚
流西去得便應添作錦江波後有朝士同在外地覩
野花追思京師舊遊云曾過街西看牡丹牡丹纔謝
便心闌如今變作村園眼鼓子花開也喜歡

雜誌

錢思公謫漢東作一曲曰城上風光鶯語亂城下烟波
春拍岸綠楊芳草幾時休淚眼愁腸先已斷年年漸
變成衰晚鶯鑑朱顏驚暗換昔年多病厭芳尊今日
芳尊唯恐淺每歌之酒闌則泪下時後閣尚有一白
髮姬乃鄧王倣歌鬟驚鴻曰吾憶先王挽鐸中歌此
聲相公其亡乎果薨於隋鄧王舊曲曰帝鄉烟雨鎖
春愁故國山川空淚眼頗相類

湖山野錄

胡汾不知何許人嘗隱廬山桑落洲一篇云莫問桑田

事但看桑落洲數家新住處昔日大江流古岸摧將
盡平沙長未休想應百年後人世更悠悠又月詩云
輪中別有物光外更無空

撫言

元和十三年進士陳標獻諸先輩詩曰春官南院院墻
東曉色初明月色紅文字一千重馬擁喜逢三十二
人同眼看魚變辭凡水心逐鶯飛出瑞風莫恠雲泥
從此別總曾惆悵去年中

同前

余昔在錢唐一日晝寢寶山僧房起題其壁云七尺頑

軀走世塵十圍便腹貯天真此中空洞渾無物何止
容君數百人其後有數小子亦題名壁上見者乃謂
余誚之也周伯仁所謂君者乃王茂宏之流豈此等
輩哉吾嘗作太白真贊云生平不識高將軍手污吾
足乃敢嗔吾今復此者欲使後之小人少知其揆也
百斛明珠

僕在徐州王子立子敏皆館於官舍而蜀人張師厚來
過二王方年少吹洞簫飲酒杏花下明年予謫黃州

對月獨飲嘗有詩云去年花落在徐州對月酣歌美
清夜今夜黃州見花發小院閉門風露下蓋歎與二
王飲時也張師厚久已死今年子立復為古人哀哉
予素不解棋因獨遊廬山白鶴觀觀中人皆闔戶晝寢獨
聞棋聲於古松流水之間意欣然喜之自爾欲學然
終不解也兒子過乃粗能者儋守張中從之戲予亦
隅坐竟日不以為厭也詩曰五老峰前白鶴遺址長
松映庭風日清美我時獨遊不逢一士誰與棋者戶

外屨二不聞人聲時聞落子紋枰坐對誰究此味空
鉤意釣豈在魴鯉小兒近道剥啄信指勝固欣然敗
亦可喜優哉游哉聊以卒歲

並同前

詩話總龜卷二十四

欽定四庫全書

詩話總龜卷二十五

宋 阮 閱 撰

感事門

西蜀楊耆數年前見之甚貧今見之亦貧所異於昔者
蒼顏華髮耳女無美惡富者妍士無賢不肖貧者鄙
使其逢時遇合豈減當世之士哉頃宿長安驛聞泣
者甚怨問之乃昔富而今貧者乃作一詩今亦贈楊君
孤村漸雨逐秋涼逆旅愁人怨夜長不寢相看唯櫪

馬愁吟互答有寒螿天寒滯穗猶橫畝歲晚空機尚
倚墻勸爾一杯聊復睡人間貧富海茫茫

玉局文

予十八年前中秋與子由觀月彭城作一詩以陽關歌
之今復過此夜宿於贛上方南北嶺表獨歌此曲聊
復書之以識一時之事雖未覺有今之悲但懸知為
他日之喜也行歌野哭兩堪悲遠火低星漸向微病
眼不眠非守歲鄉音無伴苦思歸重衾脚冷知霜重
新沐頭輕感髮稀多謝殘燈不嫌客孤舟一夜苦相

依
同前

贊皇公再貶朱崖道中有詩云十年紫殿掌洪鈞出入
三朝一品身文帝寵深陪雉尾武皇恩重宴龍津黑
山永破和親慮烏嶺全坑扈從臣自是功高臨盡處
禍來名減不由人又登朱崖郡城云獨上高樓望帝
京烏飛猶是半年程青山似欲留人住百匝千遭遶
郡城世傳贊皇公崖州詩皆仇人所作祇此二首是

真
古今詩話

明皇友悌古無有者嘗以書賜弟憲等魏文帝詩曰西
山一何高高殊無極上有兩仙童不飲亦不食賜
我一丸藥光輝有五色服之四五日身體生羽翼朕
每言服藥而生羽翼寧如兄弟天生之羽翼乎陳思
王之才足以紓國絕其朝謁卒使憂死魏祚未終司馬
氏奪之豈神丸效耶

雍洛靈異記

唐元和十三年士人下第多為詩刺試官獨章孝標作
歸燕詩獻庾承宣侍郎曰積累危巢泥已落今年故

何社前歸連雲樓閣無棲處更傍誰家門戶飛歐陽
澥亦作燕詩獻鄭愚侍郎云翩翩飛燕畫堂開送古
迎今幾萬回長向春秋社前後為誰歸去為誰來古

今詩話

盧氏子垂拱中不中第步出都門其日寒甚投宿旅舍
一客續至附火吟曰學織絲綾功未多謾臨機杼錯
拋梭莫教宮錦行家見把此文章笊殺他盧憶前詩
乃白尚書者因問其姓氏曰姓李氏世業織綾前屬

東宮錦坊見以薄藝投本行皆云如今花樣與前不同不謂伎倆兒以文采求售不重於世如此

元稹奉使東川於褒城題黃明府詩序曰昔年曾於解縣飲酒余為錄事有客後至數犯酒令併飛數杯逃席而去醒後問其人曰前虞鄉黃丞也爾後絕不復知所在元和四年三月奉使東川十六日至褒城驛有黃明府見迎問其前銜即曩日逃席者因問坐隅山川則褒女所奔之城在其左諸葛所征之地在其

右感今懷古作贈黃明府詩曰昔年曾痛飲黃令困
飛觥席上當時走馬前今日迎依稀迷姓字積漸識
平生故友身皆遠他時眼暫明便邀連坐叙無共摘
舩行酒思臨風亂霜棱拂地平不看深淺酌貪愴古
今情逶迤七盤路坡陀數丈城花疑褒姒笊棧想武
侯征一種埋幽石空閑千古情

同前

魏瓘侍郎知廣州子城一角忽頽一古塼有四大字云
委於鬼工是魏字公感其事大築新之罷而召還仲

簡待制代之未幾儂賊寇廣州外城一擊而北獨子
城堅完民賴以生賊平朝廷以公有前知之備加諫
議大夫再知五羊二年公以築城之功自論久不報
作感懷詩曰羸羸霜髮一衰翁蹤跡年來類短蓬萬
里遠歸雙闕下一身還在衆人中螭頭賜對恩雖厚
雉堞論功事已空淮上有山歸未得獨揮清淚洒春
風又五年書事詩云雖云嶺外無霜雪何事秋來亦
滿頭文潞公採其詩進呈加龍圖閣學士尹天府

南唐元宗割江之後金陵對岸即是敵境因遷都豫章
每北望忽忽不樂有詩曰靈槎思浩蕩老鶴憶崆峒
又廬山百花亭刊石云蒼苔迷古道紅葉亂朝霞皆
佳句也

隋煬帝迷於聲色高昌薦浙人項升進新宮圖覽之大
悅即日召有司具材役夫經歲而成帑庫為之一空
幸之喜謂左右曰使真仙遊其中亦當自迷也可目
之曰迷樓每一幸即經月宮女無數後宮多不得進

有侯夫人者有美色忽自縊於棟下臂懸錦囊左右
取進有自感詩三首其一曰庭絕玉輦迹芳草漸成
窳隱隱聞簫鼓君恩何處多其二曰欲泣不成淚悲
來翻強歌庭花方燭爛無計奈春何其三曰春陰正
無際獨步意如何不及聞花草翻承雨露多又云粧
成多自恨夢好却成悲不及楊花意春來到處飛又
遣意云秘洞扃仙卉雕房鎖玉人毛君真可戮不肯
寫昭君煬帝見詩反復傷感眡其屍已死顏色尚爾

厚禮葬之

寧王憲宅左有賣餅人妻有色王欲之厚遺其夫取之
寵嬖踰等閱歲因問云尚思餅漢否默然不對因呼
令見其妻注眼淚下若不勝情時坐客十餘無不悽
然王請客賦詩王摩詰先成詩曰莫以今朝寵寧忘
舊日恩看花滿眼淚不共楚王言

東海北巖畔有大石龜俗云魯般所造夏則入海冬復
止此山涯有詩云石龜尚懷海我寧忘故鄉

劉虛白昔與裴令公同研席及公主文虛白猶是舉子
試雜文日簾前獻一絕云二十年前此夜中一般燈
燭一般風不知歲月能多少猶着麻衣待至公

並同

前

余自夏歷秋每熱七八十日不衰炮灼理極意謂不復
有清涼之時今日復淒風微雨遂禦夾衣顧念茲歲
屈指可盡彭澤云我今不為樂知有來歲否此言真
可為惕然也

王直方詩話

僧可隆善詩高從誨閱其卷有觀棋句云萬般思後行
一失廢前功從誨謂可隆曰吾師此詩必因事而得
隆答曰某本姓慕容與桑維翰同學少負志氣多忽
維翰維翰登第以至入相某猶在場屋頻年敗衄皆
維翰所挫也因削髮為僧其句實感前事而露意焉
從誨識鑒多此類也

天定錄

廖齊父爽直嘗為永州刺史齊後遊零陵於民間見父
題壁感而成詩曰下馬連聲叩竹門主人何事感遺

恩回頭泣向兒童道重見甘棠舊子孫

青瑣后集

杜牧大和三年佐吏部沈公傳師幕在江西時好好年
十三始以善歌來入樂籍中後一年公鎮宣城復置
好好於宣城籍中後三歲為沈著作述師納之後三
歲於洛陽城重見覩好好感舊傷懷故題二十韻以
贈之爾為豫章姝十三纔有餘翠茁鳳生尾丹葉蓮
含跌高閣倚天半晴江聯碧虛此地試爾唱特使華
筵鋪主公顧四座始訝來踟躕吳娃引贊起低回映

長裾雙鬟可高下才過青羅襦盼盼乍垂袖聲同雛
鳳呼繁絃迸闕組塞管裂寒蘆衆音不能逐裊裊穿
雲衢主公再三歎為言天下殊贈之天馬錦副以水
精珠龍沙看秋浪明月遊東湖自此每相見三日以
為踈玉質隨月滿艷態逐春舒絳唇漸輕巧雲步轉
虛徐旌旆忽東下笙歌隨軸轡霜彫謝庭木沙煖句
溪蒲身外任塵土樽前極歡娛飄然集仙客

著作堂
合集賓

按諷賦欺相如聘之碧瑤珮載以紫雲車洞戶水聲

遠月高蟾影孤邇來未幾歲散盡高陽徒洛陽重相
見倬倬為當壚恠我苦何事少年垂白鬢朋遊今在
否落魄更能無門館慟哭後水雲秋景初斜月掛裒
柳涼風生坐隅灑盡滿襟淚短歌聊一書

蜀王後倂係入秦至劍閣閱山水之美詩云不緣朝闕
去好此結茅廬時人笑之至咸陽又作曲子云盡是
一場贏得與夫無愁入井者所校無多也

北夢瑣言

廖圖在永州有江干感興詩云正悲世上事無限細看

水中塵更多甚為識者所誚

种放在章聖朝累章乞歸賜買山銀百兩放少時有瀟
湘感事詩曰離離江草與江花往事洲邊歎復嗟漢
傳有才終去國楚臣無罪亦沉沙淒涼野浦寒飛鴈
牢落汀祠晚聚鵝無限清忠沉浪底滔滔千頃屬漁
家亦先兆也

古今詩話

開元時樂工李龜年承顧遇於東都通遠里創堂甲於
都下其後流落江南每為人歌則坐客掩泣罷酒杜

子美嘗贈詩曰岐王宅裏尋常見崔九堂前數度聞
正是江南好風景落花時節又逢君崔九即漢中令
湜之弟也

明皇雜錄

明皇初自巴蜀回夜闌登勤政樓倚欄南望烟月滿目
因歌曰庭前琪樹已堪攀塞北征人尚未還蓋盧思
道之詩也歌畢里中隱隱如有歌者謂力士曰得非
梨園舊人乎遲明為我訪來翌日力士潛求於里中
召至果梨園弟子也其夜復乘月登樓左右惟力士

及妃侍者紅桃在馬遂命歌涼州涼州即貴妃所製
親御玉笛為倚樓曲曲罷無不掩淚因廣其曲傳於
人間

明皇在南內耿耿不樂每自吟太白傀儡詩曰刺木牽
絲作老翁雞皮鶴髮與真同湏臾弄罷渾無事還似
人生一世中

並同前

東坡在黃州盡和淵明詩魯直在黔南思州聞之作偈
曰子瞻謫海南時宰欲殺之飽喫惠州飯細和淵明

詩淵明千載人子瞻百世士出處固不同風味亦相似

鄒志完過永州淡山巖巖有馴狐凡賓客至則鳴志完將至而狐鳴僧出迎以馴狐為言志完作詩曰我入幽岩亦偶然初無消息與人傳馴狐戲學仙伽客一夜飛鳴至老禪

並冷齋夜話

詩話總龜卷二十五

欽定四庫全書

詩話總龜卷二十六

宋 阮 閱 撰

寄贈門

呂文穆公蒙正嘗與溫恭肅仲舒及一友人忘其姓名
讀書於洛陽龍門山誓不作狀元不仕及唱第文穆
為狀頭溫已不意然尚中甲科其友人隨拂衣歸隱
後文穆大用太宗問昔與誰友文穆即以歸隱者對
遂以著作即召不起故文穆罷相歸洛作詩贈之曰

昔作儒生謁貢闈
今提相印出黃扉
九重鴛鴦醉中
別萬里烟霄達了
歸隣叟盡垂新白
髮故人猶著舊
麻衣洛陽謾說多
才子自嘆遭逢似
我稀故人蓋指
歸隱者也

青箱雜記

梁周翰太宗朝為館職真宗即位除知制誥柳開贈詩
曰九重城闕新天子萬卷詩書老舍人

古今詩話

五代末濠梁人南楚材遊陳潁間潁守欲以女妻之楚材
已娶薛氏以受潁守之恩遣人歸取琴書之屬似無

還意薛氏善書畫能屬文自對鑑圖其形并作詩寄之曰欲下丹青筆先拈玉鑑端已驚顏寂寞漸覺髩凋殘淚眼描將易愁腸寫出難恐君渾忘却時展畫圖看楚材見而慚焉與之偕老

唐宋遺史

韋應物為蘇州太守嘗有詩贈米嘉榮曰吹得涼州意外聲舊人惟有米嘉榮近來年少欺前輩好染髭鬚學後生又嘗赴本州司空杜鴻漸宴醉宿驛亭醒見二佳人在側驚而問之乃曰郎中席上與司空詩因

令樂妓侍寢問記其詩否一妓強記乃誦之曰高髻雲鬟宮樣粧春風一曲杜韋娘司空見慣渾閒事斷

盡蘇州刺史腸

同前古今詩話劉夢得詩

唐末士子崔郊始有婢端麗郊竊愛之他日鬻婢於襄陽司空于頔得錢四十萬因寒食出遊婢見郊立于柳陰下郊因作詩隨以贈之曰公子王孫逐後塵綠珠垂淚滴羅巾侯門一入深如海從此蕭郎是路人疾郊者錄詩以示頔頔召郊執其手曰詩公所作也

四十萬小哉何不早言因以婢贈之

唐史

雷德遜有終父子二人並命為江南淮南漕王元之贈
詩二首其一曰江南江北接王畿漕運帆檣去似飛
父子有才同富國君王無事免宵衣屏除奸吏魂應
喪養活疲民肉漸肥還有文場受恩客望塵情抱倍
依依其二曰當時詩氣壓朱雲老作皇家諫諍臣章
疏罷封無事日朝廷猶指直言人題詩野館光泉石
講易秋堂動鬼神棘寺下僚叨末路齋心猶祝秉洪

鈞元之嘗出德遜門下而德遜深於易酷于詩也

青

箱雜記

樞密邵公堯謂余詩似樂天一日閱相藍書肆得馮瀛

王詩集歸公與余語曰子詩似樂天又愛馮集將來

拈取箇豁達李老

慶歷中京師有人號豁達李老每好吟詩而詞多鄙俚以此戲之

遂皆大笑熙寧中余辟定武帥幕公自鄆附所作詩

一軸并寄余詩曰流年真似隙中駒別後情懷懶更

踈天上又頒新歷日床頭未答故人書殷勤羔鴈功

曹檄狼籍杯盤上客魚好在仲宣家萬里從軍苦樂
定何如

李文正昉呂正惠端同踐文館後皆登台輔李贈呂詩
曰憶昔就居明德坊官資俱是校書郎青衫共直昭
文館白首同登政事堂佐國廟謨公已展避賢榮路
我猶妨主恩至重何時報老眼相看淚兩行

並同前

向文簡敏中冠忠愍準二相同以太平興國五年登第
後文簡秉鈞忠愍以使相守長安文簡作詩寄忠愍

忠愍醇之曰五殿登科四十年當時僚友盡英賢歲

寒惟有公無我白首猶持將相權

唐宋遺史

劉昌言泉州人常侍陳洪進為幕客入朝為副樞嘗作
下第詩落句云唯有夜來蝴蝶夢翩翩飛入刺桐花
後為商丘記室王元之贈詩曰年來蘂落事堪嗟載
筆商丘鬢欲華酒好未陪紅杏宴詩狂多憶刺桐花
蓋為是也

同前

錢塘林逋處士有高節范文正公贈詩曰巢由不願仕

堯舜豈遺人風俗因公厚文章到老醇

張乖厓公為布衣時與陳希夷善因夜話謂希夷曰欲分先生華山一半住得無希夷曰餘人不可先輩則可及旦相別希夷以宣和中筆一枝白雲臺墨一劑蜀牋一角贈之公曰會得先生意驅某入閬處去曰珍重珍重希夷送公回謂門弟子曰此人無情於物達則為公卿不達則為帝王師公嘗感之後尹蜀過華陰寄希夷詩曰性愚不肯林泉住強要清時擬致

君今日星馳劍南去回頭慚愧華山雲

曹修司封守邵武以竹簟贈僧仁曉并惠小詩曰翠筠
織簟寄禪齋午夜秋從枕底來若也此時人問道寒
天捲却暑天開

並同前

孟賓于湖湘連上人少修儒學好詩有百篇名金鰲集
獻于李若虛侍郎因採集中佳句可取者記之于書
使賓于馳詣洛陽獻諸朝廷其譽藹然明年春與李
昉同擢進士第後事李後主為淦陽令因抵法當死

會昉遷翰林學士聞在縲絏以詩寄賓于曰初攜書
劍別湘潭金榜標名第十三昔日聲塵喧洛下近來
詩價滿江南長為邑令情終屈縱處郎曹志未甘莫
學馮唐便休去明君晚事未為慚主見其詩而宥之
復官未幾歸老連上號群舉叟吉守馬致恭以詩送
其末章云今日還家莫惆悵不同初上渡頭船

江南野錄

雅言系述記吉守送賓
于詩有全篇及賓于詩

李穎方于高弟也登第後于寄詩曰弟子已攀桂先生

猶卧雲

鑑戒錄

羅隱以諷刺之深文而不第劉贊贈之詩曰人皆言子
屈我獨以為非明主既難謁青山何不歸年虛侵白
鬢塵任汚麻衣自古逃名者至今名豈微隱見之遂
起歸與之興作五湖詩曰江東日暖花又開江東行
客思悠哉高陽酒徒半凋落終南山色空崔嵬聖代
也知無棄物侯門未必用非才一船明月一竿竹家
在五湖歸去來

施肩吾贈邊將詩曰輕生奉國不為難戰苦身多舊箭
瘢玉匣鎖龍鱗甲冷金鈴繫鶻羽毛寒皂貂擁出花
當背白馬騎來月在鞍却恐犬戎臨虜塞抑營時把
陣圖看

杜荀鶴善于詩有贈僧句云安禪不必須山水滅得心
頭火自消又云利門名路兩何憑百歲風前短焰燈
只恐為僧心不了為僧心了是輸僧

翁承贊唐末為諫議大夫使福州至劍浦縣見舊識僧

亞齊贈詩云蕭蕭風雨建陽溪溪畔維舟見亞齊一
軸新詩劒潭北十年舊識華山西吟魂昔向江村老
空性元知世路迷應笑乘輶青瑣客此時無暇聽猿
啼

唐陸希聲以雙鉤寫字法授僧詵光詵光入長安為翰
林供奉而希聲尚未達以詩寄詵光曰筆下龍蛇似
有神天池雷雨變逡巡寄言昔日不龜手應念江湖
泝潏人詵光感其言薦希聲後至宰相

並同前

興國中潘若冲罷桂林經南岳留鶴一隻與廖融贈詩
一章云峭格數年同野興一官纔罷共船歸稻梁少
飼教長瘦羽翼無傷任遠飛側耳聽吟侵靜燭銜花
作舞帶斜暉朝天萬里不將去留伴高人何釣磯若
冲到京授維揚通理臨行復有詩寄融曰曾經別墅
住行蹤春浪和烟撼釣筒共步幽亭連石蘚寄眠靜
榻帶松風秋來頻夢岳雲白別後應添鶴頂紅又泛
汴舟隨汴水不堪南望思忡忡後至維揚聞融與鶴

相繼而亡若冲感而又為一絕云南岳僧來共歎吁
風亭月榭已荒蕪先生去世未十日留伴高吟鶴亦
徂融卒未久潘有泉陵之命經隱居有詩哭云天喪
我良知無言雙淚垂惟求相見夢永絕寄來詩應有
異人吊從茲雅道衰春風古原上新塚草離離

雅言

雜載

杜羔妻劉氏善為詩羔累舉不第將至家妻即先寄詩
曰良人的的有奇才何事年年被放回如今妾面羞

君面君到來時近夜來
烹見詩即時回去尋登第妻
又寄詩云長安此去無多地
鬱鬱葱葱佳氣浮良
人得意正年少今夜醉眠何處樓

南部新書

張介以命術遊公卿門寓居錢塘西湖上嘗自京師南
歸士大夫率為詩贈之呂許公王沂公時方執政亦
皆有詩夏鄭公留守南京為詩懷二公曰上公詩筆
千金重逋客歸裝一舸輕莫到青山更招隱且留明
哲為蒼生

鄭谷雪詩云亂飄僧舍茶烟濕密洒歌樓酒力微江上
晚來堪畫處漁人披得一簑歸有段贊善善畫因采
其詩為圖曲盡瀟洒之意持以贈谷谷為詩以謝之
云贊善賢相後家藏名畫多留心于繪素得意在烟
波屬與同吟咏功成更琢磨愛余風雨句幽絕寫漁

簑

古今詩話

歐陽价工傳神楊次公贈之詩曰國手曾煩寫幾回無
人彷彿醉顏開青銅鑑裡尋常見不謂今從筆下來

奉職劉祕亦贈詩曰筆妙今為第一人心期造化奪
天真精神形骨從來一移入青鱗似兩身

古今詩話

唐相鄭絳贈老僧詩曰日照西山雪老僧門未開凍瓶
粘柱礎宿火隱爐灰童子病歸去鹿麋寒入來自云
此詩可以衡稱輕重不偏也嘗有人問相國近有新
詩否曰詩在灞橋風雪中驢子上此中安可得之

同

前

王定保唐光化三年李渥侍郎下及第吳子華侍郎饒

為婿子華即世定保南遊湖湘無北歸意吳假緇服
自長安來明日訪其良人白于馬武穆王令引見定
保於定保寺吳隔簾謂之曰先侍郎重先輩以名行
俾妾侍箕箒侍郎沒慮先輩以妾改適是以不遠千
里來明侍郎之志定保不勝慚赧致書武穆乞為婿
吳確乎不拔定保為盟畢世不婚矣吳歸吳中外家
沈彬有詩贈定保云仙桂曾攀第一枝薄遊湘水阻
佳期皋橋已失齊眉願蕭寺行逢落髮師廢苑露寒

蘭寂寞丹山雪斷鳳參差聞公已有平生約謝絕女
蘿依兔絲定保後為馬不禮奔五羊依劉氏官至卿
郡閣雅談

賈島為普州司倉方干寄詩曰亂山重複疊何路見先
生豈料多才者空垂不第名閑曹曾得醉薄俸亦勝
畊莫問為詩苦年年芳草生

鑑戒錄

稷山驛吏王金作吏五十六年稱有道術往來多贈篇
什李義山有詩贈云過客不須詢歲代唯書乙亥與

時人

令狐絢自湖州刺史拜翰林學士因夜召對坐從容語
及文宗大稱之由是眷遇有加未幾拜相因郊裡侍
祠還趙嘏贈詩云鶚在雲霄冰在壺代天才業共訐
謨榮同伊陟傳朱戶秀比商王入畫圖昨夜星辰廻
劍履前年風月落江湖

自湖州召入纔二年

不知機務時多暇

猶許詩家屬和無

詩史

李贊皇頗開寒素之路及南遷或人贈詩曰八百孤寒

齊下淚一時南望李崕州

徐鉉謫居舒州贈彭芮云賈生去國已三年短褐閒吟
翫水邊終日野雲生砌下有時京信到門前無人與
和投湘賦愧子來浮訪戴船醉裏新詩好歸去莫隨

騷客賦林泉

並同前

陳文惠堯佐退居鄭下張退傅知西京以姚黃魏紫及
酒惠文惠答詩曰有花無酒頭慵舉有酒無花眼倦
開正向西園念蕭索洛陽花酒一時來

寒齋廣錄

詩話總龜卷二十六

欽定四庫全書

詩話總龜卷二十七

宋 阮 閱 撰

書事門

唐高宗承正觀之後天下無事上官儀侍郎獨持國政
嘗凌晨入朝巡洛水堤步月徐轡咏詩云脉脉廣川
流驅馬入長洲鵲飛山月曉蟬噪野風秋音韻清亮
群公望之如神仙焉

小說舊聞

長和國使人布燮聽蜀妓洞雲歌詩云嵇叔夜鼓琴飲

酒無閒暇若使當時聞此歌拋擲廣陵都不藉劉伯
倫虛生浪死過青春一飲一石猶自醉無人為爾卜
深塵又思鄉詩曰虜北行人絕雲南信未還庭前花
不掃門外柳誰攀坐久銷銀燭愁多減玉顏懸心秋
夜月萬里照關山

鑑戒錄

江南人多畬田先爇爐爇

音餽

縱火燎草也爐火燒山界

也俟經雨乃下種歷三歲土脉竭不可復種藝但生

草木復爇旁山宋西陽王子尚部鄞縣有畬田

音畬
畬

也田子尚言山湖之俗爌山封水澤山須爌爐後種劉

禹錫適連州作畬田詩云何處好畬田團團縵山腹鑽

龜得兩卦上山燒卧木又云下種暖灰中乘陽折茅蘗

蒼蒼一雨後苔穎如雲發白樂天子規歌云畬田有粟何不

啄石楠有枝何不棲畬

音羊諸反

爾雅云一歲曰蓄二歲

曰新三歲曰畬易曰不蓄畬皆同音凡三歲而不可

復種盖取畬之義也

談苑

進士科始隋大中盛於正觀永徽之際縉紳雖位極人

臣不由進士者不以為美其推重謂之白衣卿相又
曰一品白衫其不利者謂之三十老五經五十少進
士有老於文場者亦無恨焉故有詩云太宗皇帝真
長策賺得英雄盡白頭

撫言

浮玉老師元公欲為吾買田吾有詩云江山如此不歸山江
神見恠驚我頑我謝江神豈得已有田不歸如江水
今有田矣而不歸無乃食言於神耶

百斛明珠

世常傳云欲人不知莫若不為以謂既為之也安得人

之不知夫至隱至密者莫若中冓之事豈欲人之知
邪然而不能使人不知以此凡事之不循理者雖毛
髮之細不可為也明皇舊置五王帳長枕大被與兄
弟同處於其間無何妃子輒竊寧王笛吹之始亦不
彰因張祜詩云梨花靜院無人處間把寧王玉笛吹
妃因此忤明皇不懌乃遣中使張韜光送歸楊鉞宅
妃子涕泣謂韜光曰托以下情繳奏妾罪固當萬死
衣服之外皆聖恩所賜惟髮與膚生從父母爾今當

即死無以謝上乃引刀剪髮一結附韜光以獻自妃之放逐聖情憮然妃髮至張韜光取搭之肩上明皇見之大驚惋遂令高力士就召以歸嗟乎道路之言亦可畏也使張祜不為此語事亦何由彰顯之如此然張亦何從得此為之說以此可驗其欲人不知莫若不為亦名言也

唐末有宜春人王叡者以歌詩擅名於時嘗作玉樹曲壁月夜夜瓊樹春蓮古泠泠詞調新當時狎客盡豐祿

直諫犯顏無一人歌舞未終樂未闋晉王劍上粘腥血君
臣猶在醉鄉中面上已無陳日月此詞大播于人口
轂未第時嘗於市廛中忽見同人被無賴輩毆打轂
前救之揚聲曰莫無禮識吾否吾便是解道君臣猶
在醉鄉中面上已無陳日月者無賴輩聞之歛恥慚
謝而退噫無賴者乃小人也能為此等事亦可重也
方其倚力恃勢勃然以發兇暴之氣將行毆擊視其
死且無悔矣及一聞其名則慙謝之色形于外斯亦

難矣有改悔之恥尚善之心得不謂之君子哉

百斛

明珠

戚綸密學初仕為吉州太和令里俗頑悍喜結誣訟公
至以術漸磨先設巨械嚴固狴狴其簠挺組索比他
邑數倍民已自悚駭次作諭民頌五十絕不事風雅
皆風俗易曉之語俾之諷誦以申規警立限日誦半
年頑心不悛一以苛法治之果因此獄訟大減其詩
有云文契多欺歲月深更將疆界強相侵官中檢出

真無偽枷鎖鞭笞痛不禁大率類此江南往往有本
玉壺清話

今時市語答人真實事則稱見來此語蓋已久矣坡贈
黃山人詩云面頰照人元是白眉毛覆眼見來烏
方詩話

羅虬羅鄴羅隱齊名號三羅李孝恭籍中有紅兒善肉
聲嘗為二車屬意聘隣道虬請紅兒歌而贈之繒綵
孝恭以副車所貯不令受所貺虬怒拂衣而起詰旦

為絕句百篇號比紅兒詩盛行于時

撫言

盧仝詩云何時得去禁酒國今吾謫嶺南萬戶酒家有一婢昔嘗為酒肆頗能伺候冷煖自今當不乏酒可以日飲之何其去禁酒國矣

玉局文

上元夜登樓貴戚例有黃柑相遺謂之傳柑東坡有扈從端門觀燈詩云老病行穿萬馬群九衢人散月紛紛歸來一盞殘燈在猶有傳柑遺細君蓋謂此也

直

方詩話

前輩戲語有西湖風月不如東洛軟紅香塵之語故東坡和錢穆父蔣穎叔從駕景靈官詩云半白不嗟垂項髮軟紅猶戀屬車塵

李方叔為坡公客坡公知貢舉而方叔下第有詩云平生謾說古戰場過目還迷日五色山谷和之云今年持橐佐春官遂失此人難塞責蓋是時山谷亦在貢院中也

舟人占雲若砲車雲起輒急避雲乃大風候也東坡有

云今日江頭天色惡砲車雲起風欲作文潛有云喜
逢山色開眉黛愁對山雲起砲車

冰廳事見因話錄云歐陽有詩云獨宿冰廳夢帝闕

余疑李賀云酒滴珍珠紅夏彥剛云江南人造紅麴酒
白樂天云羌管吹楊柳燕姬酌葡萄謂太原出葡萄酒
也然此乃律詩用平聲讀則太不律用仄聲讀則近
俗耳

京師災實最盛於會靈觀之凝祥池故文忠詩曰凝祥

池鎖會靈園僕射荒村安可比而東坡又云忽憶嘗
新會靈觀滯留江海得加飡僕射坡在鄭州世亦稱
其其實也

同前

老杜有坐開桑落酒句世說謂桑落何多美酒而庾信
有從蒲州刺史乞酒詩云蒲城桑落酒灞岸菊花秋
詩云年老身閑無外事麻衣草坐亦容身相逢盡道休
官去林下何曾見一人蓋載於雲溪友議而歐陽文
忠以謂相傳作俚諺慶厯中天章閣待制許元為江

淮發運使因修江岍得此石于池湯江水中始知為

靈徹詩何邪

同前

宥護尚書言來禽以味甘來衆禽也而東坡和舒王詩云
青李扶疎禽自來何邪

醪醑本酒名也新開花本以其顏色似之故以取名山
谷所以有名字因壺酒風流付枕幃之句又云風流
徹骨成春酒夢寐宜人入枕囊

宜或作疑

京師舊無鴨脚李文和自南方來移植于私第因而着

子自後稍稍蕃多不復以南方者為貴歐陽文忠作
詩云鴨脚生江南名實未相浮絳囊因入貢銀杏貴
中州致遠有餘力好奇自賢侯因令江上根結實夷
門秋始摘纔三四金奩獻凝旒公卿不及識天子百
金酌歲久子漸多累累枝上稠玉人名好客贈我比
珠投博望昔所徙葡萄安石榴想其初來時厥價與
此侔今也徧中國籬根及墻頭物性久雖在人情逐
時流惟當貴其始後世知來由是亦史官法豈徒續

君謳

劉太真與韋蘇州書云顧著作來見足下郡齋燕集想亦云何情致暢茂道逸之如此宋齊間沈謝吳何始精於理意緣情體物稱詩人拍後之傳者甚矣其源推足下制其橫流師摯之始闕睢之亂于足下之文見之矣則知蘇州詩為當時所貴如此燕集所作乃兵衛森畫戟燕寢凝清香也

晉文潞公來朝裕陵待以殊禮禁從三省皆為賦詩李

籍云三公歷拜榮無敵二府更居貴莫倫畢仲游云
十年三冊命四海一師臣皆為能叙其官爵錢長卿
云三陪藻燕簪裾上五對龍顏日月邊又云黼座勸
觴釣樂逸雲章屬韻侍貂傳此為叙其恩禮盖公自
初覲至出闕賜特燕者三登對者五上親勸以御觴
而後復和其所賦故長卿云爾

詩云白藕作花風已愁

或作秋

不堪殘睡更回頭晚雲帶

雨歸飛急去作西窓一夜秋

或作愁

此趙德麟細君王氏

所作也德麟既鰥居因見此篇遂與之為親余以為
乃二十八字媒也

秦少游為黃門錢穆父為戶部皆居於東華門之堆垛
場少游春日嘗以詩遺穆父云三年京國鬢如絲又
見新花發故枝日典春衣非為酒家貧食粥已多時
穆父以米二石送之復為二十八字云儒館優賢蓋
取願校讐猶自困朝饑西隣為祿無多少希薄才堪
作淖糜時人以少游有如此才而亦食粥似不相稱

耳

東坡寄柳子玉云聞道床頭惟竹几夫人應不解卿卿
又送竹几與謝秀才云留我同行木上座贈君無語
竹夫人盖俗謂竹几為竹夫人也山谷云竹夫人廼
涼寐竹器憇臂休膝非夫人之職而冬夏青青竹之
所長故為名曰青奴嘗作詩曰穠李四弦風拂席昭
華三弄月侵床我無紅袖堪娛夜正要青奴一味涼
穠李昭華貴人家兩女奴也張文潛後作竹夫人傳

宣勸字東坡數使之其一和王仲至喜雪御筵詩曰宣
勸不多心自醉其一和蔣穎叔端門觀燈詩云十分
宣勸恐難勝

東坡謫黃州居於定惠院之東雜花滿山而獨有海棠
一株士人不知貴東坡為作長篇平生喜為人寫蓋
人間刊石者自有五六本云吾平生最得意詩也

杭州有西湖而穎亦有西湖皆為遊賞之勝而東坡連
守二州其初得穎也有穎人在坐云內翰只消遊湖

中便可以了郡事蓋言其訟簡也秦觀少章因作一
絕以獻云十里荷花菡萏初我公所至有西湖欲將
公事湖中了見說官閒事已無後東坡到潁有謝執
政啓亦云入叅兩禁每玷北扉之榮出典二邦輒為
西湖之長

並同前

唐德州刺史王倚家有筆一管粗于常筆刻從軍行人
馬毛髮亭臺山水無不精絕刊兩句曰亭臺琪樹已
堪攀塞北征人尚未還

古今詩話

北方白雁似鴈而色少白秋深乃來白鴈至則霜降河
北人謂之霜信杜甫詩云故國霜前白鴈來即謂此

同前

大丞相劉公沆赴舉道過獨木鎮有老人出曰知公赴
舉有一聯相贈曰今年直跨窮驢去異日當乘寶馬
歸公曰何以知之叟曰公自是羅浮山玉源道君公
愧謝叟乃去

青瑣集

王仁裕嘗養一猿名之曰野賓久而放之因作詩曰放

爾丁寧復故林舊來行處好追尋月明巫峽堪憐靜
路隔巴山莫厭深棲宿免勞青嶂夢躋攀應慙白
雲心三秋果熟松梢健任爾高枝徹曉吟後入蜀過
嵯峨祠前漢江之陰有羣猿聯臂而下飲清流有巨
猿捨羣而前從者指之曰此野賓也呼之猶應哀吟
而去又作一篇云嵯峨祠邊漢水濱山猿連臂下嶙
峋漸來仔細窺行客認得依稀是野賓月宿應勞羈
旅夢松棲那復稻梁身數聲腸斷和雲叫識得前年

舊主人

勝說后集

東坡南遷有侍兒王朝雲請從行坡佳之作詩有序曰
世謂樂天有鶯駘馬放楊枝詞佳其至老病不忍去
也然夢得詩云春盡絮飛留不得隨風好去落誰家
樂天亦曰病與樂天相伴住春同樊素一時歸則樊
素竟去也余有數妾四五年相繼辭去獨朝雲隨余
南遷因讀樂天詩戲作此贈之不學楊枝別樂天且
同通德伴伶玄伯仁絡秀不同老天女維摩總解禪

經卷葯爐新活計舞裙歌板舊因緣丹成隨我三山
去不作巫山雲雨仙蓋紹聖元年十一月也三年七
月朝雲卒葬於西禪寺松林中直大聖塔和前詩曰
苗而不秀豈其天不使烏童與我玄駐景恨無千歲
葯贈行唯有小乘禪傷心一念償前債彈指三聲斷
後緣歸卧竹根無遠近夜深勤禮塔中仙

冷齋夜話

杜甫贈高適詩云脫身簿尉中始與捶楚辭韓退之贈
張功曹詩云判司卑官不可說未免捶楚塵埃間杜

牧寄小姪阿宜詩云參軍與簿尉塵土驚皇皇一語
不中治鞭撻身滿瘡以此明唐之參軍簿尉有過即
受笞杖之刑猶今之楚吏也

遜齋閒覽

俗云槐花黃舉子忙謂槐之方花乃進士赴舉之時而
唐詩人翁承贊詩云雨中粧點望中黃勾引蟬聲送
夕陽憶得當年隨計吏馬蹄終日為君忙乃知俗語
亦有所自也

詩話總龜卷二十七